

重修兩淮鹽法志

兩淮鹽法志卷八十二

督銷門

江甘食岸

江都甘泉爲揚郡首邑全盛時戶口極繁故銷二萬六千七百餘引己酉改章折爲六百斤大引辛亥綱半額行六千九百八十九引稱爲暢岸蓋科則甚輕未免侵越鄰境此其所以暢銷也咸豐初江都甘泉配高郵寶應泰興爲五岸後泰興試辦官運旋另招商爲專岸不在五岸之列而以安徽之天長縣居高寶之西南藉固藩籬配爲五岸復添儀徵滯岸六州縣實一商兼認由

運司派員籌銷新章備列庶有攷焉志江甘食岸

雍正十年運司范廷謀詳揚州府屬地近鹽場例不銷引
惟江都一縣額行鹽二萬六千七百十引原爲綱食口
岸之藩籬緝私第一要法則在查送屯船蓋屯船有不
得不停泊之處如灣頭非候水性不能上閘北橋非候
放橋給旗不敢開行揚關非候鈔完查訖不能過關此
停泊之時卽其偷爬之候今據商人王永壽等呈請自
宜陵至三汊河自邵伯至灣頭一帶設塘十處無分晝
夜常川巡緝又委諳練總商帶領巡商二名分巡查察
屯船偷爬乃江都商人切膚之害又該商等生長此地

隘口弊藪久所熟悉以熟悉利弊之人務去切膚之害其盡心竭力自與尋常之兵役不同應請撥費令商自行巡緝經兩江總督尹繼善鹽政高斌批允

乾隆十一年九月鹽政吉慶奏高寶泰興三州縣前於酌籌除弊等事案內請引試行自乾隆八年題定高郵州每年派銷二千五百引寶應縣每年一千引泰興縣每年二千五百引詎自定額以來高郵州甲子乙丑兩綱均多壅滯寶應縣乙丑綱亦未全銷緣該州縣與場竈接壤鹽艘往來貧難老少多以零星拋散泥鹽易換食物是以民間鮮買官鹽惟泰興一縣距場較遠民間盡

食官鹽額引不敷銷售應請將高郵額引內撥出六百引寶應額引內撥出四百引加增於泰興縣行銷作額部議覆准

乾隆三十五年九月戶部議覆兩江總督高晉等覆奏江都甘泉二縣食引難銷請自庚寅綱起通出五分融銷綱地一摺前據該鹽政奏請融綱經臣部照例議駁今據該督等會議覆奏江甘戊子綱鹽未銷己丑綱鹽未運新舊積壓實有難以銷售之勢該督撫鹽政身臨其地所稱該商等願將己丑未運之引納課銃銷其爲官鹽壅滯似屬實在情形至所請江甘二縣食引通出五

分融銷綱地之處例不准行但既將己丑綱未運之引
納課銃銷融綱銷售係屬疏通官引起見可否照該督
等所奏自庚寅綱起暫准融銷照綱陞課俟二三年後
積鹽疏通再行酌復原額奉

旨依議欽此嗣於三十九年鹽政李質穎以江甘二縣滯銷如
故請將運出五分食引永遠融綱奏奉部議仍准以五
分暫爲融綱俟積鹽銷完之後再試行一年所有本綱
留運五分食鹽於民食有無缺乏之處臨期確核情形
再行奏報核辦

乾隆五十三年六月鹽政全德奏請融銷一摺部議行鹽

下
各
有
地
面
向
來
同
省
州
縣
或
有
此
滯
融
彼
之
事
至
隔
省
鹽
斤
除
江
都
甘
泉
二
縣
食
鹽
奏
明
融
銷
楚
省
外
其
餘
並
無
准
其
通
融
代
售
者
何
以
他
省
鹽
斤
准
至
楚
省
越
界
銷
售
且
果
係
兩
地
通
融
自
應
於
滯
銷
之
後
始
運
至
暢
銷
地
面
何
得
有
正
鹽
未
來
融
鹽
先
到
情
事
該
鹽
政
所
奏
殊
未
明
晰
請
令
該
鹽
政
查
明
覆
奏

乾
隆
五
十
四
年
八
月
鹽
政
全
德
以
江
甘
捆
溢
鹽
斤
年
終
通
扯
配
割
套
積
因
循
易
滋
弊
竇
行
據
運
使
鹿
荃
議
詳
查
淮
南
綱
食
引
鹽
向
係
請
運
正
鹽
後
卽
酌
數
完
納
錢
糧
預
請
皮
票
俟
正
鹽
將
到
稟
驗
票
本
請
領
引
目
發
儀
備
割
其
江

甘食鹽向無請存割引之例自應畫一辦理惟查江甘食鹽資本微末每票不過二三百引配割零星應聽各商隨時酌量預請存儲配割仍於投請割引之時卽完足請呈加錢糧將三項銀票並硃單一併投司循例出給花名引單發商持赴庫大使領引投司臚印卽將引目銀票填具照單呈院查核引目銀票分別註銷祇將照單用印發司飭發知事查照配報一面查照照單引數另給諭單發商憑赴知事衙門按票註明配割俟照單內引數割竣由知事申繳運使核明轉呈銃銷俾錢糧不致貽誤而辦理章程亦覺捷便經鹽政全德批允

乾隆五十六年三月鹽政全德以淮南口岸銷鹽漸有起色奏准將江甘五分融引收回本岸以復舊額卽銷不及額亦祇於各食岸通融裒益隨時報部復於五十八年八月戶部覆准鹽政巴甯阿奏江甘應銷鹽引撤回本岸之後積鹽愈多實難照額行銷自癸丑綱起仍以五分留運本岸五分融銷綱地

嘉慶二年五月運司曾燠詳甘泉縣西鄉陳家集向設總店分售見在行銷頗滯若不設法巡緝終無起色應設巡役十四名飭令上官司巡檢督率查拏經鹽政批允嘉慶十年四月鹽政佶山奏增淮南江都甘泉二縣食鹽

二萬六千七百一十引增高郵寶應泰興三州縣食鹽
六千引

咸豐四年六月署運司郭沛霖詳江甘等五岸向因地近
場竈祇完報部正課其餘外帶雜款概不完納迨至己
酉改行新章各岸科則一律扯平該五岸查照楚西等
省減完雜款一半以冀本輕價賤藉可敵私上年查辦
就場徵課案內核定科則每引一兩七錢三分零另帶
經費四錢五分未經分晰口岸茲據江甘五岸委員候
補大使鄒觀廷候補知事褚霖稟稱查五岸銷數以江
甘爲最計自揚城收復人民凋敝食戶不及十之二三

流民多未歸里較之平時益形狹隘見在鹽價每斤不
過數文計商鹽成本卽增至一倍尙不敷錢糧應用況
遭兵燹之後商情困頓以致眾皆畏避思維再四惟有
查照舊制核減科則以輕成本並據該員等請照丁未
戊申等綱江甘原則每引八錢八分五釐三毫二絲一
忽五微八纖高寶原則每引八錢四分六釐八毫五絲
九忽二微三纖加完一半前來署司查江甘等五岸從
前每引四百斤見在每引六百斤自應照引半完課據
請各照丁未戊申原則加完一半計江甘每引完銀一
兩三錢二分七釐九毫八絲二忽三微七纖高郵寶應

每引完銀一兩二錢七分二毫八絲八忽八微四纖五沙仍各每引加帶經費銀一錢核計成本輕減藉以維繫商情且查該五岸雜項己酉改章以前向係免納見於籌辦竭蹶之際雖屬減輕科則仍係率由舊章理合詳請鑒核咨部經鹽政怡良批仰候核咨

咸豐九年十月署運司喬松年詳奉憲臺札開案據前司詳商販盛協和認辦泰興三百引當經怡前部堂批飭趕緊請重仍將未認懸引速行認辦以完引額嗣據呈報捆運二百引先行赴岸等情各在案迄今未據將續認續運各若干已未銷鹽各若干具報等因署司卷查

泰興岸引先於咸豐四年十二月內據商販盛協和認
運三百引五年九月稟捆壩鹽二百引運岸銷售當經
郭前署司批令將未認懸引速行認辦以足引額未據
具認嗣於本年三月郭前署司因岸額攸關未便久懸
卽經札委候補知事馮清本會同泰興縣將該岸額運
引鹽招商認辦或由官領運通盤籌議稟奪旋於是年
閏五月據該員馮知事前泰興縣施令會稟泰邑白軍
興以來並無商販領運屢經設法招徠無如地方瘠苦
戶鮮盈充縱有豐饒之戶又因從前舊商虧折意存畏
縮咸有戒心惟有延董籌墊資本暫請領運二百引起

泰州官棧照例完稅請運試行官銷等情據經郭前署
司批准試辦仍令上緊招商認引納課隨據該員等遵
赴泰棧納課請照運銷八年二月聯前司以該員辦運
引數與泰興岸額懸殊飭據該員於是年四月九年二
月先後稟請領運四百引查照高寶科則納課請運均
經聯前司嚴飭認真疏銷接續辦運以足引額署司到
任後亦經查案催令照額加認完課運銷各在案至今
未據續運合再札催該員會同泰興縣妥速籌辦趕運
趕銷並將銷存鹽數分晰造報經鹽政何桂清批查泰
興口岸五年之久先後請運八百引僅及一年額銷之

半懸殊太甚仰卽嚴飭馮清本會同該縣妥速籌辦並
將經手銷存鹽數分晰造報如再惰誤亦卽由司另行
委員辦理是年十一月署運司喬松年又詳查此案署
司具詳後於十月二十八日據泰興縣知縣金以誠稟
稱竊卑邑額銷引鹽從未照額銷足推原其故總因逼
近場竈鹽路甚廣禁不勝禁防不勝防溯自道光三十
年改行票鹽以來迄今十年之久卑邑共僅運一千五
百引統計終年銷鹽不過一百五十引爲數甚屬有限
以前卑境本不走鹽近因江路梗塞改由卑境行走小
販票鹽沿途零賣在所必然官鹽價貴私鹽價賤人情

良法竊欲爲

事關奏案且江甘高寶各邑情形不同非卑職一人所

敢定議然領銷之弊一日不除小民之累一日不去竊思近來鹽路旣如此其多則凡窮鄉僻壤自難按數派銷至如城鎮鋪戶以及紳衿士庶似應買食官鹽未便違例食私致干

功令見查局中存鹽將次可以銷完所有領運商董已由卑職會同委員撤退擬請從咸豐十年起試行官運一年查明城鎮大小各鋪以及紳衿士庶諭令自行赴局買食不准地保領銷勒石永遠示禁經此改章之後未必銷鹽便有起色然可去民一累較諸近年銷數當亦有增無減等情到司署司當查地保派銷實爲弊政卽

經如稟批令革除永禁並飭令將應如何設法疏銷章程具稟一面先行納課請運不得坐聽滯銷去後尙未據該縣具覆所有續銷委員至今並未續認續運既經責令該縣設法疏銷卽毋庸委員在岸督辦業經署司札飭該委員候補知事馮清本回泰銷差經鹽政何桂清批仰卽飭令該縣將疏銷章程卽日稟由該司核議詳奪勿任延飾並將委員銷存鹽數分晰造報

咸豐十年四月運司喬松年詳據泰興縣金令稟稱卑邑向來銷鹽分派地保領銷假官營私擾累病民不堪枚舉經卑職稟准立案永禁改行官運每年預納五百引

課銀陸續請照重運先行試辦在案茲已督董酌定章程實心經理行之期年可收成效人見羨餘悉數歸公且以留備救荒自必樂趨卑職所稟五百引大約總可銷足並可希冀續行請運等情並呈章程前來本司查該縣所議章程均尙妥協當批飭督率實心經理廣爲疏銷庶便民卽以裕課並將章程呈祈鑒核一定分銷以免遺漏也以前地保領銷舍紳戶而不問隱富戶以得規無非派諸小戶今擬反其道而行之無業小民概令自行赴局買食所有紳衿鋪戶舉凡有力之家均應查明戶口年年應需食鹽若干詳細按戶造冊先令

照數繳價給發鹽票俾持票赴局領鹽惟各鄉離城寫
遠若令紛紛赴城領取運費轉昂於鹽價未免強人所
難應俟查完一處卽由局預定日期將該處所分鹽票
按數駁運到地同時憑票分散俾免赴城領運儻仍貪
賤買私不食官鹽日後查有遺漏之戶冊內無名除照
章補食外卽應從重議罰專款存儲以充孤貧口糧棉
衣之用俾示薄懲某鎮係某董會同某董查報均於冊
面登明庶日後有所查考 一刪閒費以歸善用也此
次由官設局專爲甦民累完課額起見向有閒費概行
刪除不准絲毫濫用每年歲底清盤一次譬如一年運

銷鹽若干引共用過課銀場價運費若干辛俸局用飯
食若干分銷鹽若干零銷鹽若干兩項共入錢若干斯
出入數目一望瞭然所有餘下錢文提出公儲以七成
買穀留備地方荒歉之用三成撥補保嬰恤殘孤貧書
院等項不敷之用設有不敷則全數買穀別項用款一
概不准擅撥所買穀擔存儲邑西之西倉按年積買不
必拘定出陳易新或遇歉年米價昂貴公同議明酌量
出糶以平市價其錢暫行存典生息一俟成熟卽行買
補歸倉以備災歉 一分責任以嚴稽核也新章由官
設局實賴董事實心經理公舉廉正董事數人總司出

入分司查銷完課督銷官任之銀錢出入董任之稽察
銷數按戶分派官與董並任之至動價買穀或撥補何
項善舉必得官董會商明確方能動用 一減鹽價以
勸樂銷也泰邑官鹽以前定價每斤二十四文今酌減
四文每斤定二十文較之私鹽價值所貴有限庶人人
樂銷不致貪賤食私矣

同治元年六月運司喬松年詳據江甘商人江長源稟稱
竊天長六合岸引前經稟明由商試辦嗣因兩城失陷
卽行停運茲已先後克復未便任其虛懸除六合逼近
長江歸入稅鹽銷運外所有天長一岸向爲江甘高寶

西北藩籬亟應設法復運保固岸引擬先請運五百引
循照上屆試辦成案運至邵伯總棧暫爲存儲趕覓湖
船過載由湖直達秦欄等處地方卽在彼地賃屋堆存
隨時察核銷售祈札行沿途州縣營汛加意巡護並飭
江甘駐岸督銷巡緝委員一體籌銷嚴緝經鹽政曾國
藩批允

同治二年正月運司喬松年詳據江甘等岸籌銷委員周
成璋韓茂萱稟稱據商人江長源稟江甘口岸至辛亥
綱減折運行之後每年額行大鹽六千九百八十九引
商於咸豐七年陳明岸疲銷滯情形請先按年認行三

千四百九十四引五分稟蒙前運憲郭詳奉前督鹽憲批准飭遵在案商自認運以來適值該岸引地疊遭兵燹以故前數年運不足數近蒙堵緝嚴密私蹤斂迹加之商不惜成本減價敵私銷市漸臻暢旺岸務日有起色伏查自咸豐七年認運起屆今已閱六年雖原認之初未經如額而按額綜計實該請運四萬一千九百三十四引茲截至本年十月共已請運三萬七千七百三十三引以近年暢銷之有餘補抵滯銷之不足通扯牽算計尙短缺四千二百一引所有續後請運之引應請先儘此數銷算清楚再行接辦下年額引似此截清界

限庶岸額如數運足引課亦不致轆轤本司查江甘岸
引前因銷市疲滯是以祇照減定額數認行一半今岸
銷旣已暢旺據請以近年暢銷之有餘抵補各年滯銷
之不足自爲復額裕課起見應請俯如所稟辦理惟摺
開本年運數係截至十月底止其十一月內請運之一
千引應於短缺數內畫除實計六年之內按照舊額扯
算尙有未運三千二百一引除批令該丞等督飭該商
趕緊接續運清外一面分年補具認結二分呈司存轉
同治二年十月鹽政曾國藩批運司許如駿詳江甘食岸
一案查江甘等岸食鹽僅收課而不完釐比稅鹽科則

較輕誠如來詳影射出江在所難免據詳減額加捐由
司委員前赴孔家涵掣驗自係爲力杜弊源起見惟減
定之三千五百引仍准免釐適足開取巧之端況額定
引數亦未便擅議減折緣減額之後設遇銷滯該商僅
照三千五百引請運非但捐款無從徵收卽正課亦虞
短絀所議殊未盡善江甘食鹽銷數旣尙暢旺應無分
額內額外一律酌加鹽釐責令仍照原額認運方爲正
辦究竟該兩岸每引約計本銀若干見在售價若干可
加釐銀若干仰再督同總局秉公妥議另詳察辦其高
郵寶應泰興三岸體察情形一併議詳

同治三年正月署運司忠廉詳據淮南總局委員武丞等詳准江甘督銷委員候補運判陳倅移稱卷查該商江長源先於咸豐四年承運江甘岸鹽正值揚城甫復之後煙戶凋零已成廢岸經商等不惜重資竭力整頓設法招販減價敵私始克漸有起色當承運之初奉定每引完課一兩四錢二分七釐零捆鹽六百六十斤本較稅鹽課重斤減是以江甘向不派捐迨後稅鹽抽釐日重難保買鹽水販不因之取巧出江嗣奉郭前升憲飭議於額銷之外照數抽釐期杜其弊當經貴局議於溢運引內按引抽完一兩三錢零茲准奉札前因查江甘

每引六百六十斤見與稅鹽斤重相等所有鹽價每引四千二百文錢糧每引合錢二千二百文又包索水腳每引六百文又捆掣各費每引四百文又總棧分店辛工火食及緝私募勇等款年無定數銷暢則費卽扯輕銷絀則費自加重約計每引扯合一千六百文統共每引成本實需九千文外在邵伯總棧按斤零銷每斤十五六文不等按包躉售每斤十四五文凡挑販子店轉運至各鄉集鎮分銷另加水陸舟車等用其價不無稍增溯查前數年銷絀費重業已虧折不堪近兩年銷數較旺始克保本縱獲微息究不敷抵應捐釐之數勢

難照稅鹽一律抽收據陳倅來移核計江甘成本每引扯合九千文內外售價每斤十四五文及十五六文不等以六百斤並滷耗餘斤計之是每引售價約合十千有零除去成本祇有千餘文之利既已杜其影射出江而又不分額內額外令其概完出江之釐似稍畸重卑職等悉心籌議除本年溢運之引仍照前議辦理外擬請自來年正月起責令該商查照所認六千九百八十九引按年承運無分額內額外每引概抽釐銀六錢隨同正課一併於請運時先行完繳則額課旣無短絀釐捐亦按引而徵似更無從取巧至高寶兩岸額運無多

且距出江之路較遠似尙無從影射擬請仍免加釐飭
令照實運一千三百八引之數按年運足不准短少又
秦興一岸乃著名疲滯之區久已無商認運近年稅鹽
經由口岸出江卽在該邑境內一經招商認岸轉恐淆
混不清易滋弊竇擬請仍飭該縣暫運稅鹽以濟民食
俟淮鹽全復舊制再行籤商認辦以符成法詳請核轉
等情查江甘岸鹽額行大引六千九百八十九引近年
運銷溢額固難保無影射出江自應酌令加釐以杜取
巧透漏前署司議將額引減半額外完釐原爲多繳釐
銀起見但未計及滯銷之年該商藉口缺運誠如憲批

非但捐款無從徵收卽正課亦虞短絀今就該岸成本
售價扯計仍照原額引數酌量加釐無論銷數暢滯庶
免影射出江及藉口缺運之弊請自同治三年正月起
仍照原認六千九百八十九引責令按年認運每引除
完正課之外加完釐銀六錢於請運時隨課併繳係屬
折中核算而於憲批無分額內額外一律酌加亦適符
合其高寶二岸地居內河腹裏距江較遠額引無多不
致影射取巧亦應請如所議免予加釐又泰興一岸見
爲稅鹽出江之境招商認運轉多淆混且素稱疲滯之
區亦恐無商應招近年由縣試行官運應請仍令該縣

照章運鹽以濟民食經鹽政曾國藩批允照辦惟場鹽由下河運達江甘難免弊混應照前詳令出孔家涵口由司委一結實可靠之員駐涵掣驗以杜重斤夾帶之弊復由司詳江甘鹽船由涵運行河道艱阻改於樊汊鎮掣驗亦經鹽政批行

同治三年八月署運司忠廉詳據商人江長源具稟續請江甘岸鹽一千引繳呈課釐銀兩請照發重等情當查江甘口岸見在每年額運六千九百八十九引該商於本年已請運過一萬引所有溢運之引應行作何銷算該岸何暢銷若此其中有無影射出江情弊卽經札飭

淮南總局江甘籌銷各委員查議稟覆茲據該員等稟稱會查江甘二縣原額二萬六千餘引嗣減運六千九百餘引該二縣自遭兵燹戶口流離該商雖請認運試辦之初諸務均未講求未能銷行足額近來認商於緝私疏銷諸務不惜經費極力整頓故岸務日起且查江甘偏近下河濱鄰泰屬之北六場在前商力拮据聽其透私江甘卽隱受其衝近則北六場收數日多卽以本年之運數暨見在存堆之鹽數稽之較之前數年幾至加倍私能少透官卽多銷更爲一定之理今該二岸於半年之閒銷鹽一萬引雖已逾認引之數而較之原定

之額所缺尙多惟旣收私盡官銷之效自應仍照源源運銷冀其多售一引之鹽卽多收一引之課況前奉督鹽憲批飭無分額內額外一律酌加釐銀本年憲庫課銀之外已多收釐銀六千兩該商業已完釐更無所用其趨避至影射出江該岸南近瓜口西近儀徵誠爲可慮見在沿江局卡嚴密稽查未聞查有江甘影射之鹽似尙可信應由卑職等隨時查察以期周密至江甘迤西之天長一縣前因收復未久流亡尙未復業雖亦經該商江長源認辦迄今尙未辦運聞見在戶口漸多或者肩挑負販之徒藉鹽謀生亦該岸暢銷之一助應令

該商趕運天長之引以專責成目下既未便禁其接濟
卽未能限其多銷也所有該商前請一千引已奉將完
繳課釐收庫應請給照趕重以濟岸銷署司查江甘岸
引既據該員等查明近因該商極力整頓私盡官銷沿
江局卡雖未查有江甘影射之鹽亦不可不防微杜漸
自應責令該員等認真稽查如該商以食鹽影射出江
別經發覺卽惟該員等是問至本年運過一萬引據稱
雖已逾認運之數而較之原定之額所缺尙多似應俯
如所請仍令源源運銷並飭趕運天長岸引以裕引課
而專責成經鹽政曾國藩批如詳飭遵該兩岸銷數仍

不得逾志載原額二萬六千七百餘小引折成大引一萬七千八百餘引以示限制如有影射出江情弊定惟該官商是問

同治三年十月運使忠廉申查天長一岸原定運額七千三百五十六引向隸淮北每引捆重四百四十斤因與江甘等岸界毗連道光十五年經俞前司詳准借運南鹽以固藩籬應完課項祇完淮北正款並無外帶雜項自咸豐三年軍興以後岸廢引懸先據商人江長源援請照辦均經分別報明在案昨據天長縣俞令稟以該縣人民復舊請催認商趕運岸鹽濟食當查刻下江

路肅清鹺綱須復舊制所有該岸引額課釐應如何核定俾期復舊之處卽經札飭淮南總局及該岸督銷委員等會議稟覆茲據稟會查天長一岸本隸淮北原額七千三百五十六引每引捆重四百四十斤向運南鹽以固藩籬應完課項亦照江運八岸之例祇完淮北課項並無外帶雜項自咸豐三年軍興以後岸廢引懸有商人郭泗請照江甘科則認運復因銷滯延不納課旋據商人江長源赴轅援請認運并未核定引額今查江甘科則每引一兩四錢二分七釐九毫八絲三忽奉定加完釐銀六錢其完課釐銀二兩二分七釐零天長一

縣原定北鹽四百四十斤小引茲據拊重南鹽大引六百六十斤應照原額七千三百五十六引折重大引四千九百四引責成該商辦運以爲定額應完課釐是否卽照江甘每引繳納二兩二分七釐九毫八絲三忽飭令完納之處伏候核示復查該縣原額七千餘引歷係重運四百四十斤今據議稟旣運南鹽請照六百六十斤折成大引四千九百餘引作爲每年認行引數核與原額數相符合其完課項在前本請查照江甘科則徵完今江甘奉飭加完釐課據請仍照加完數目繳納亦屬允協經鹽政曾國藩批允

同治四年九月運司李宗義詳據江甘商人江長源稟稱
江甘等岸引鹽向由泰壩過掣運岸銷售前因兵警之
時引地廢弛私梟充斥爲輕本蔽私之計適總棧移於
邵伯奉准改於下河樊汊鎮掣驗不過一時權宜辦法
茲綱食各岸引鹽統由泰壩過掣運行江甘何敢以本
重運艱稍從遷就致涉兩歧應請循舊由場過壩稱掣
高寶天長向走下河達岸見在亦請一律過壩稱掣以
重稽查惟旣經泰壩過掣之後上河下河無所分別據
進顧家圩孔家涵達邵伯收倉分售可免仙鎮之擁擠
及六閘之耽延本司查江甘引鹽由壩過掣本係舊制

近年改於下河掣驗一水達岸不過一時權宜辦法據請循舊過壩稱掣並將向走下河之高寶天長引鹽一律過壩自爲慎重稽查力求核實起見應如所稟辦理經鹽政曾國藩批允

同治五年七月署運司程桓生詳案照商人何銑因案斥革其原認江甘高寶天長五岸食鹽亟應另籤接替查有商人王天錫資本充裕好義急公堪以籤令認辦當經諭飭該商遵照具認並札行總局籌銷各委員一體飭遵旋據淮南總局委員詳據職員王天錫稟稱職本布業營生不諳淮南鹺務前奉陞任運憲郭諭飭招徠

集資辦運不得不勉圖報效今疊奉傳諭肫肫更烏容
諉卸惟有廣爲招徠先行試辦第江甘舊章原則每引
僅完正課八錢八分零高寶原則八錢四分零原爲輕
本敵私起見己酉改章以四百斤改爲六百斤成引每
引完正雜課銀二兩二分零兵燹以後江長源及何銑
稟認之時奉准援照己酉前舊章科則每引繳完引半
之課江甘計完一兩三錢二分零高寶計完一兩二錢
七分零均另完經費一錢及南鹽改行稅法每引祇完
課銀九錢而江甘等岸未邀核減是以各項捐釐厯蒙
各前憲咨免有案同治二年前商江長源銷引逾格恐

有影射偷漏釐捐致奉查辦江甘兩岸加釐六錢本年
又因查辦續奉加釐一兩二錢一分零天長一律照辦
惟高寶兩岸加釐六錢則自本年爲始成本過重虧累
實多此際諭籤接辦若照見在加釐章程責令招徠必
致十無一應設因加釐遽請加價又恐有礙岸銷緣江
甘等岸以內河引鹽行銷腹裏引地必須輕本乃可減
價減價乃可敵私所以江甘等岸售價較之外江食鹽
售價僅得其半此外江食岸有釐內河食岸無釐之由
來也職再四思維惟求各大憲體恤下情仍請援照同
治二年以前成案江甘等岸概免加釐儻因定案已久

未便遽更或請照二年以後核定章程分別納辦江甘
天長一律加釐六錢每引仍其完釐課二兩二分零高
寶附近場竈額引無多向未抽釐見在奉加六錢應與
江甘天長見加之一兩二錢一分零一併乞恩詳免尙
可設法招徠如蒙俯允惟有慎而又慎守法奉公非但
不圖逾額深恐不能足額查江甘原額本岸例行一半
一萬四百餘引合大引六百斤計六千九百八十九引
從前尙銷不足茲旣招徠新商自應照章請運其例定
融楚一半勢難仍似前商一概收回本岸運行惟願銷
數暢旺除本岸外多運一引之鹽卽多完一引之課總

不致逾全額之外至高寶天長三岸每年額行六千五百七十一引惟有儘銷儘運儘運完然亦擬試辦三年力求整頓保固藩籬此後如有殷商獨力永遠認運職斷不存戀棧之心稟乞詳請示遵以便出具認狀趕納趕運再前商查有各岸醬園認銷冊結應請飭令查交以杜買私影射其所建鹽倉房屋亦求飭令估價交替卑職等查江甘食岸引數於辛亥綱核定每年額運大引六千九百八十九引此係未經兵燹以前認運之數迨揚城克復後經商人江長源稟請認辦該岸銷數逐漸加增較之辛亥綱額引溢銷至八九千引之多難

保無侵越鄰境情弊見據該商王天錫稟明遵籤試辦
請照原額六千九百八十九引照章承運該商人甚誠
樸辦事謹慎既據稟明試辦自當力圖報效守法奉公
斷不致稍有侵銷透漏致蹈前轍此時似未便仍以前
商溢銷引數責令認辦而該商所請援照原額六千九
百餘引能否足敷民食亦覺尙無把握可否令其實力
整頓暫准儘運儘銷俟試辦一年後察看情形再行定
額其高寶天長等岸是否循照辦理伏候示遵至所稱
請免加釐一節查本年春閒卑職等因江甘天長等岸
售價與儀徵浦六等處未能畫一詳請每引加釐一兩

二錢一分零高寶加釐六錢奉准在案茲據該新商稟稱各岸一經加釐成本過重虧累滋多若加售價又恐有礙岸銷稟請免釐等情係爲減價敵私起見是否准其暫緩加釐抑應照章完繳之處請核示遵卽經署司飭將運本店用各數確切核明另行議詳去後今據該局詳據該商王天錫稟稱查高寶兩岸原額一千六百六十七引應與江甘見定引數一體勉遵承運惟天長原額四千九百四引從前銷行不足係以淮北票課撥補造報亂後逃亡未復銷數愈微見在又無票課撥補萬難照額全完前商江長源上年亦僅請運二千引可

爲明證是天長一岸應求儘銷儘運儘完引少則
扯費益重並求與江甘兩岸免再加釐以輕成本以上
五岸皆屬內河或附近場竈或界連淮北非減價不能
敵私是以五岸售價驗之外江食岸價僅得半所以從
前概免捐釐歷次奉有成案前商江長源遞奉加釐想
因銷引逾額加釐乃所以示罰誠如批示從前影射出
江在所難免此際奉籤接辦在新商則守法奉公在新
章則星羅碁布旣不敢蹈前商之覆轍卽難循照前商
之加釐所有運本店用成本若干原不難按照賣價通
盤核計第商甫經承辦尙未運到片引其釐課鹽本水

腳尙可類推如岸用則毫無把握浮開恐取朦蔽之咎
漏敘難免賠累之虞伏查五岸總分各店不下二十餘
處夥友雇工巡役不下二百餘人交替倉房店底不下
一萬餘串固非親歷經支不能開呈案牘且坐本亦關
成本必須年終通計見尙不知銷引若干勢難按引懸
擬轉非核實之道總之成本過重售價輕則成本更形
喫重凡此皆實在情形前以江甘天長新加之一兩二
錢一分零與高寶新加之六錢一併求免並非希冀取
巧實有不得已之苦衷一切難逃鑒察署司查江甘食
鹽從前影射出江在所難免是以歷次加額加釐至如

此之多見在南鹽改道瓜洲處處設巡勢難照前透漏
該商王天錫人甚誠樸辦事謹慎且認運伊始非前商
承認有年確有把握者可比應請俯如該商所稟各岸
引數責令先行分別承運務須實力整頓總期多運一
引之鹽卽多得一引之課仍俟辦運一年再行酌量定
額至本年所加之釐係爲籌濟餉需起見但未計及成
本盈虧旣據該商一再陳明本重價輕甫經籤辦成本
難以懸擬若又責令照完商情畏阻有礙招徠亦屬實
在情形且自本年加釐之後前商請運之數大爲減色
此卽成本加重之明證似應准其暫免加完俟年終核

明成本確數如果餘利較盈仍應酌數議加以昭核實
經鹽政李鴻章批查認岸以定額包課爲最要之義本
年三月閒丁運司以江甘等岸科則較甯屬各岸輕重
懸殊詳請加釐係爲杜絕透漏起見本無庸議改章程
惟查江甘兩岸先於同治二年每引加釐六錢本年復
加一兩二錢零據稱成本過重尙屬實情該商王天錫
旣係誠樸謹慎當此承辦伊始一切費用不無增多姑
准將本年新加之一兩二錢零酌減一半以示體恤天
長一岸卽照江甘一律減完其高寶兩岸同治二年本
未隨同江甘一律加釐直至本年僅每引加納六錢除

畫去奏明應加之課所贍鹽釐祇一錢有奇何能全數減免以致正課短缺至各該岸額數必須於承辦時核定方可按額催收釐課豈容含混前商以影射出江請運多多益善本非正辦自應照准原額江甘每年認運六千九百八十九引高寶每年認運一千三百八引其天長一岸歷年旣未足額姑准照額先認五成仰卽轉飭遵辦並取具包課無誤切結呈送備案爲要

同治六年九月署運司程桓生詳奉憲批據江甘商人王天錫的名王治稟請退岸務招徠接辦等情奉批認辦江甘五岸之王子鑑旣已病故其子能否接辦所招運

商儲鼎裕是否殷實可靠仰淮運司確查妥議詳辦卽經札行淮南總局查議具覆茲據該局詳稱遵查江甘五岸引鹽上年籤令該商王天錫認辦以來於籌運疏銷一切事宜均稱無誤見在該商究竟能否勉力照常接辦據稱營運支絀招有運商儲鼎裕卽儲豐裕情願認辦查該商辦運多年向稱殷實見在接辦五岸食鹽所措場垣店底運鹽資本皆係實在足敷轉輸斷不致稍有貽誤所以趕緊招徠力求稟退皆爲慎重公事起見又據商人儲豐裕的名儲桂生稟稱竊商向辦楚西引鹽與認辦江甘高寶天長五岸之王天錫素識交孚

本年王天錫病故其子王治以楚西岸銷疲滯資本不敷難以轉輸惟恐因循誤公未敢繫戀招徠商更名接辦商念同袍之誼

國課民食之重目覩該商焦急係屬實情查五岸運務遵照見定章程辦理商自揣尙能勝任署司查商人王天錫上年認運江甘五岸引鹽曾據稟明試辦三年見在僅及年餘尙未滿期且承認至今共已請運二萬四千二百餘引按照原認額數計溢一萬三千四百餘引之多釐課裕如辦理洵屬得宜足稱殷實可靠本未便率行更張今據該商王治以父故年輕求退甚力並據儲

豐裕卽儲鼎裕具稟情願更名接辦聲明除場垣店底兩項外另備運本五萬串足敷轉輸斷不致稍有貽誤查該兩商彼退此認皆係出諸情願而儲豐裕之接辦由王治之招徠如將來經理不善以致運銷引數較前短少有誤課餉應惟原招之王治是問經鹽政曾國藩批旣據查明認商儲豐裕向稱殷實接辦江甘五岸引鹽資本足敷轉輸仰卽責令儲商照章包課請運取具認保各結呈送查考

同治六年十二月運司李元華稟據江甘等岸籌銷委員范丞志熙等稟據商人儲豐裕稟稱江甘岸價從前原

定每擔庫紋一兩六錢歷有年所兵燹以後減爲躉售
每包制錢一千四百文零售每斤二十文專爲敵私起
見上年前商王天錫重運通屬場鹽每包酌加一百四
十文每斤酌加二文昨於郵邑夏茂之具稟案內蒙局
憲憲臺會查見在售價每包一千五百四十文每斤二
十二文以每擔一兩六錢划計尙屬有減無增惟鹽分
通泰一節似覺稍有窒礙不得不據實縷陳查見在新
章整頓鹽色餘呂上色尖鹽專運湘鄂前商不得已重
運濟急本非江甘所宜配運而和鹽牌價通屬之掘港
拼茶等場與泰屬之新興伍祐等場每包相去不過十

數文二三十文第通屬一水直達轉運易而水腳輕泰屬過壩換船擡運難而水腳重貴賤難易相衡實則不相上下若以通泰場鹽之牌價定江甘之岸價不但難以畫一而且易滋淆混況食岸鹽價向視岸銷暢滯隨時長落岸銷滯則私鹽多雖運到通屬場鹽總必須減價以敵私岸銷旺則私鹽少卽運到泰屬場鹽亦必須提價以保商本前商售價每斤二十文在未經加釐前酌加二文在旣經加釐之後卽如高寶未奉加釐是以仍舊每斤二十文情形本有不同是提價之由實非盡因運通屬場鹽也商接辦以來江甘鹽價遵賣每斤二

十二文而私鹽充斥之區閒亦有酌減以廣招徠未敢固執定價高寶照舊每斤二十文惟天長一岸分店四處離水口數十里或百數十里不等舟車盤駁水腳較重前商於鹽價之外酌加腳力實爲蔽私起見仍售每斤二十文見在天長一岸銷數稍有起色未始不由於此見在銀價日貴核計成本不特配運通屬場鹽卽專運泰屬場鹽亦屬不敷商再四思維惟有慝情籲懇除高寶課本較輕仍照每斤二十文出售外所有江甘天長等處岸價擬請量子酌提或應如何變通之處出自憲施卑職等伏查食鹽各岸向以銷市之暢滯定賣價

之長落江甘等岸厯係率由舊章前由郵邑職員夏茂
之未悉鹽章懷疑具稟經卑職等會同淮南總局委員
查明前商王天錫以通泰之場鹽定多寡之賣價並未
逾定章每擔庫紋一兩六錢之數並申明如果實有應
行變通酌量裁減之處由該商隨時稟請憲示飭遵稟
明前憲在案今據該商儲豐裕稟陳鹽分通泰室礙情
形卑職等細加查察該商自接辦以來天長一岸減去
腳力湖西各店酌減招販皆屬實在情形復思該商既
知酌減以疏銷設使虧折誤課轉得有所藉口惟遽行
加價又恐有礙疏銷查戶部則例內載淮鹽一條於綱

岸賣價確有定制而各食岸則云價隨時售均無一定
卑職等悉心計議該五岸賣價除高寶課本較輕仍照
每斤二十文出售外所有江甘天長等處岸價應請復
循舊制較提滯跌惟提價每斤不過二十二文之外以
免病民跌價每斤不得在二十文之內以固商本如此
明定章程嗣後無分通泰場鹽均照一律辦理以歸畫
一而免淆混似於變通之中仍寓限制之意本司查食
鹽各岸向視場產之豐歉岸銷之暢滯定賣價之長落
因時制宜江甘岸價於乾隆年間詳定每擔庫紋一兩
六錢奉行已久近年每包躉售制錢一千四百文零售

每斤二十文係爲敵私而減價前商王天錫因重運通屬場鹽成本較重每包酌加一百四十文每斤酌加二文並未逾於詳定價目原無病民情事應請准其照辦以昭核實經鹽政曾國藩批江甘等岸售價自應核定畫一章程以資遵守據議高寶課本較輕仍照每斤二十文出售其江甘天長三岸每斤提價不得過二十二文之外跌價不得過二十文之內尙屬妥協應准照辦同治七年十二月瓜棧程國熙詳竊照江甘高寶天長五岸食鹽瓜棧向不過問此次憑鹽派引凡出場之鹽均須隨時核扣以昭公允是該食岸捆重引數瓜棧不可

不知值此整飭伊始必須明定章程方免朦混擬請由司轉飭該岸商人查明每年應銷引數若干在於何場何垣買運赴司棧總局稟明立案以便於派引時核扣該食鹽向銷次色祇准買運和鹽不准買運尖鹽亦不准指買赴瓜之鹽另行改捆以杜跌價影射之弊緣棧鹽每引八包每包八十六斤江甘等五岸食鹽每引十包每包六十六斤包數斤重均不符合是以必須指重若截留赴瓜之鹽則須由泰壩改捆易滋流弊經鹽政馬新貽批查江甘等五岸前因試辦伊始未據詳定引數其各岸銷數亦未據各該縣申報而該商請運場鹽

非常暢旺難保無影射出江情弊應將該岸每年實銷鹽數卽日查明議定何岸銷數若干具詳立案以示限制而杜侵灌一面先飭各該縣自明年正月起將到岸銷存鹽數按旬開具四柱清摺逕報本部堂以便隨時稽核其泰興靖江兩岸買運何垣之鹽亦應知照瓜棧並令一律將銷數按旬具報查考

同治八年二月鹽政馬新貽奏得天長一岸原額四千九百四引前商王天錫認辦時照額先辦五成儲商接認照案辦理上年十二月曾經本部堂飭查江甘各岸實銷鹽數今該司重議定額尙未具覆茲聞天長一岸

近來銷數頗旺科則又輕難保無侵灌鄰岸情弊亟應
加增引數以杜取巧據運司李元華詳據籌銷委員等
稟稱查該五岸原定額引江甘二萬六千七百十引除
一半融楚外計留運食鹽一萬三千三百五十五引高
寶二千五百引天長四千九百四引前商王天錫於同
治五年認運江甘六千九百八十九引高寶一千三百
八引天長二千四百五十二引見商儲豐裕於同治六
年十月接認稟明查照前商定章辦理均未照額運足
綜核近三年銷數江甘約在一萬一二千引不等高郵
約在二千八九百引不等寶應約在一千二三百引不

等天長約在三千五六百引不等是銷數逾於認數自應遵照憲札分別酌中加引以杜趨避取巧之弊卑職等悉心酌議擬請自同治八年正月江甘定以一萬引高郵定以二千五百引寶應定以一千引天長定以三千五百引共爲一萬七千引較之原認一萬七百餘引計加六千二百餘引應令該商另具認結按年包課經鹽政馬新貽批檢閱清摺該五岸銷數連年暢旺異常均應分別增引以昭核實查志載高寶原額以小引折大引祇一千六百六十餘引今昔情形不同自應從新酌定據議高郵定以二千五百引寶應定以一千引

又天長原額小引折大引計四千九百四引今定三千五百引均尙酌中應准照辦其江甘兩岸最暢之年銷至一萬五千引之多僅據酌議一萬引尙嫌其少查江甘原額二萬六千七百十引折成大引計一萬七千八百餘引本部堂酌核應先飭認一萬三千引如果銷數仍溢應與天長再行逐漸酌增以冀規復舊額至各該岸應完鹽釐除高寶兩岸邀免外其江甘長三岸每引應繳釐銀六錢連年銷數有溢無缺其溢銷之引應完之釐是否一律隨課繳清復經運司詳查江甘天長等岸每引加完釐銀六錢向於請運時隨同正課一併繳

納始行核給重鹽護照無論運銷缺溢均係一律照完並無區別

光緒九年十一月鹽政左宗棠批江甘岸商儲豐裕稟該商見因銀錢支絀據請將江甘高寶天長等岸另行招商認辦事屬可行惟查該商兼認者尙有儀徵一岸是否一併退岸稟內未據聲敘此岸較疲必須連江甘等暢岸一併交接至所招之商是否殷實可靠該商有無欠繳課釐仰淮運司確查詳辦

光緒十年九月鹽政曾國荃批准南總局稟暢滯分配一案查江甘暢岸必須以儀徵滯岸配認迭經嚴切批明

在案乃江甘新舊交替於儀徵一岸多方推諉見又別具鼎裕新花名稟請試辦三年殊不知儀徵定數祇一千引即使片引不銷以江甘之力賠此課釐尙綽乎有餘況經理得宜亦尙有利可獲何必如此取巧鈔黏司批甚屬明晰殷商辦運以保藩籬顧大局爲主仰署運司卽飭遵批配認則江甘便可照准如竟堅執不允亦不必勉強卽將江甘酌加認引再令交替可也旋據署運司程桓生詳案查江甘五岸商人儲豐裕稟請退岸招有商人甞同豫接辦稟奉前憲左批飭儀岸較疲必連江甘等暢岸一併交接至所招之商是否殷實可靠

有無欠繳課釐仰卽確查詳辦經孫前升司查明與同
豫尙稱殷實儲豐裕並無短缺課釐具文詳覆嗣於鼎
裕新請認儀徵試辦三年案內又奉憲批江甘暢岸必
須以儀徵滯岸配認卽飭遵配江甘便可照准如竟堅
執不允亦不必勉強卽將江甘酌加認引再令交替茲
據淮南總局轉據江甘五岸認商與同豫稟稱奉飭兼
認儀岸遵卽邀同前商議明定於光緒十年十一月十
六日接替冬季釐金與前商各認一半預釐一款歸商
按限分繳以清界限至一切請運岸務公事請另立公
奉來旗名出取認保各結稟乞轉詳等情由局轉稟到

司署司伏查儀徵滯岸既據江甘新商鬯同豫遵批兼
認另立公泰來旗名似應准與江甘五岸一併更名承
運以專責成經鹽政曾國荃批允

光緒十五年十一月江甘高寶天長五岸商人鬯同豫稟
稱商自認運以來一切疏銷整飭事宜靡不加意講求
悉心經理不期私充銷滯年復一年以致引額缺運套
搭虛懸空賠庫釐累無底止所兼儀徵滯岸原以江甘
有餘扯補見計並江甘而亦無餘虧益加虧更有竭蹶
不支之勢伏查五岸引額前商王天錫原認江甘六千
九百八十九引高寶一千三百八引天長二千四百五

十二引共一萬七百四十九引嗣因暢銷額溢奉飭酌
加經籌銷委員議覆定以江甘一萬引高郵二千五百
引寶應一千引天長三千五百引共一萬七千引仰蒙
前憲馬批示江甘尙嫌其少核定一萬三千引其餘高
寶天長均准照辦等因轉飭遵行在案是前此認引旣
因溢銷而議加今日缺銷自可權宜而議減就銷數以
定引數折中準則亦屬因時變通惟有仰懇鴻慈俯念
江甘疲銷商困與曩時暢銷情形迥異賞將續加引數
自本年一起暫減五千引計每年實認八千引名雖減去
三分之一而核之前商原認六千九百餘引仍屬有增

無減惟冀緝務得人銷市轉暢卽當隨時規復斷不敢因循取巧自外生成此外如高寶天長三岸認引無多缺數無幾悉仍其舊經鹽政曾國荃批查認岸以包課爲第一要義豈容率請減引姑念江甘兩岸近年銷滯據稱虧益加虧有竭蹶不支之勢係屬實情銷疲減額尙有成案可循惟所請暫減五千引未免過多應准暫減三千引自光緒十六年起以兩年爲度兩年以後如果銷市較暢仍應酌加兩年以內儻銷逾定數亦應照完課釐以重庫款其餘各岸悉循其舊

兩淮鹽法志卷八十二

兩淮鹽法志卷八十二 督銷門 江甘食岸

兩淮鹽法志卷八十三

督銷門

江運八岸

淮北引鹽本皆湖運其廬州府屬五岸向由臨淮水運至瓦埠登陸車運達廬州分赴各岸自乾隆五十六年奏改江運其後來安滁州桐城三岸亦如之道光中改行票法試辦官運歲行八萬引至咸豐初長江梗阻復議改湖運而未果同治七年始定運北鹽每年一萬二千引出江其後增至三萬六七千統歸皖岸核算且以官收餘鹽給商不占正額而桐城初食南鹽旋復舊制

食北鹽則所謂八岸者廬得五滁得二安慶得一以南
商運北鹽暫作權宜之計藉圖久遠之規因考其本末
著於篇志江運八岸

近全椒亦運北鹽共九岸

乾隆五十一年五月鹽政全德奏淮北引鹽行銷廬州府
者向由洪澤湖過臨淮關至瓦埠地方雇覓牛車陸運
一百四十里抵廬州分往各岸惟是去冬今夏臨淮關
以上涇河淺阻舊在瓦埠起旱者改在壽州之石頭埠
計多陸運一百六十里腳費益貴運亦艱滯今上游涇
河雖水長而陸運之處必須人牛現當收麥插秧之
時無可雇覓而民食攸關勢難稽緩查廬州各口岸俱

可通江臣飭令該商等卽將廬鹽由運河出瓜洲徑往沿江之裕溪口入廬州分運各岸俟將來上游水暢人牛可雇時仍卽停止奉

硃批甚屬可行該部知道欽此旋於五十六年復經全德奏准廬州府從前陸運時每年僅銷一萬餘引自改江運後逐漸多銷近年竟能銷至二萬餘引詢之商人據稱陸運時牛戶偷爬驛和鹽色不潔民願食私今則江船一直抵岸並無驛和民間得食好鹽私販無利可圖不禁自止是以官引暢銷並於前往江西路過廬州時詢之該處士民亦稱江運後得食好鹽實屬無窮利益茲據

廬州府稟江運已有成效應請永爲定例是江運可以
絕牛戶驛和之弊即可杜私販侵越之途洵屬商民兩
益除廬州一府應令商人照常江運外查滁州及來安
縣亦係食淮北陸運之鹽該處亦有河路可以通江臣
見令商人仿廬州之例一體江運行之亦有成效理合
奏明常令江路轉運

謹按合肥巢縣廬江無爲舒城滁州來安七岸改江
運昉此

乾隆六十年六月鹽政蘇楞額奏淮北行銷安徽廬州府
屬及滁州來安縣引鹽於乾隆五十六年經前任鹽政

全德奏准改由江運永爲定例至安慶府屬之桐城縣亦例行淮北引鹽其運道向由淮安之烏沙河裝船過洪澤湖至正陽關改駁運抵霍山縣水程一千八百餘里復自霍山縣改包裝車運赴桐城陸路三百餘里腳費旣多鹽價不能輕減而車夫偷和沙土鹽包又多不淨以致民多食私且偶遇山河夏漲則車運稽延乾隆五十七年經桐城縣詳據該邑士民呈請仿照廬州等岸之例改由江運當經前鹽政全德批飭運司鹽道覆核詳准試行如辦有成效再行具奏茲查該岸改由江運以來轉輸旣速腳費減輕因而鹽價就平鹽色亦淨

官引暢銷是江運桐城引鹽實屬商民兩便應請與廬州等屬一體改由江運奉

硃批該部知道欽此

謹按桐城改江運昉此

道光十五年正月運司俞德淵以淮北江運各岸額引前因北商無力請運詳明將上年運楚官鹽二萬五千引改撥江岸濟售見在江運各岸奉鹽政派撥文武員弁認真巡緝私梟斂迹官鹽將次銷竣雖經催商認辦無如北商均多疲乏不堪止有王允泰程人和尙能辦運因上年並未捆發秋單緩不濟急而壩所存置官鹽亦

不足七千併引自應如北監掣所稟收買場鹽以便官
爲運售今酌擬收買五萬票引循照道光十二年局收
之案於板浦場太平西臨兩局每局收買一萬三千引
中正場花垛局收買八千引臨興場臨浦局收買一萬
六千引照奏定票鹽價值每引給發價銀六錢連錢席
人工在內所收之鹽另堆局中報驗聽候委員按照票
鹽章程一引分爲四包隨時發運其所需鹽價銀三萬
兩查有奏准收買餘鹽銀十萬兩除動用外尙有未用
銀三萬一千兩於此款內動支因飭海分司先於徵存
票稅內分別給發收買一面具領抵解以免往返領解

之繁經鹽政陶澍批准

道光十五年二月鹽政陶澍批運司詳查江運八岸及天
長一縣原係奏准留商認運之岸今北商無力辦運據
詳請將江運八岸額引改令淮南捆運西吉之商按成
分派運行等情所議既足以資調劑又可保衛淮南藩
籬誠爲一舉兩便惟查江運八岸多與安池太及甯和
含各食岸地界毗連今江運北鹽歸於辦運西鹽商人
分運除西商向有認運安池太等岸引鹽者不致以北
充南外其餘辦運西引之商能否不致侵越淮南且江
運八岸兩年官運三萬餘引尙未銷足歷辦淮北奏銷

均以票鹽溢運之課抵補足數此時專歸西吉之商認
運能否按綱照額全完不復以票鹽抵補其科則之外
加完雜費四錢將來歸完楚岸代攤西岸匣費之後是
否酌留亦應籌及至上年飭場領買鹽五萬引留備江
運目前既改商運所有舊買票鹽五萬引是否卽由南
商領運並天長一縣原額七千三百五十六引改運南
鹽籤商認辦照本減價果否卽可足額不須以票鹽撥
抵奏銷之處見係創立新章且須具奏均應預爲妥籌
方不致於奏准後辦理掣肘

道光十五年三月鹽政陶澍批運司詳查江運八岸該司

所議向辦西吉商人無安池太及甯和含等處認引不及十分之二三其請運西吉無多則派給江運亦少不致自相侵越今西吉商人得資津貼能將西吉額鹽按綱運足則江運額引亦按綱派給毋論鹽斤能否運竣責令埽數完清北課不准絲毫蒂欠其江運科則每引本止一兩五分有零其餘四錢八分零皆係帶完己庚及戊子舊欠所有見議每引加完雜費四錢一俟歸清楚岸代攤匣費應仍照數加完歸補北商道光三四等年借項等款卽己庚戊子錢糧帶清之後亦應另查欠款按數接續列帶俾免庫款虛懸等情均尙妥協惟本

年試行雖爲時較遲至年終截數尙有十月之久總須飭商趕緊完課捆運庶西吉旣資起色而江岸亦免惰誤不得豫存票鹽撥補之心致干咎戾該司仍嚴催海分司等務將上年飭買之五萬引如數收齊以備南商領運並飭各場垣每年各照額產留備十分之三以免南商臨捆遲誤至該司前詳由北監掣按船掣驗申請給發程引護運一節事原簡捷但仍須照例申請印照以免沿途羈遲其淮北舊商中如果竟有按成先請西吉者自應准其一律派給江岸以示公允再天長一縣原同江運八岸奏明仍歸商運此時暫先援案借運南

鹽俟行之有效再爲奏改事尙可行但須令何商暫先辦理應卽詳明核籤以專責成而全課運

道光十五年七月運司俞德淵札分司查江運岸額雖經派分西吉商人認運未據納稅請辦所有買存官鹽應先委員赴場領捆卽經飭委五員分爲五批每員每批各領一萬引由場捆就中包趕運至壩過河俟運至清江卽交署北掣廳稱收擇地堆儲或預備官運或轉給南商隨時酌核辦理茲據委員稟稱辦運北鹽首重購備包索以五萬引所需包索同時購買難免包戶居奇查得邳州寶應西壩等處皆有包行應請每批先發銀

二千兩前往購定並備自揚至場一切零用所需船價等項毋庸先行攜帶卽由海州分司於徵存票鹽錢糧內就近撥領應用較爲妥便等情除每批支發包案銀二千兩備帶應用外該分司俟委員等來場議定需船價若干卽由該分司於徵存票稅內撥給如有不敷卽行稟請委員解發至水腳等項從前成案均多浮濫此次務須撙節不得稍任虛糜致滋浮冒

道光十七年海州分司童濂奉鹽政札據淮南商人黃正泰包振興莊玉興和福盛請運江岸引鹽二萬引又據黃正泰續請江運四千引包振興包元泰續請江運一

萬引飭令照數捆發乘時趕運抵壩俾資儲備卽經照
數派買行知場局各員令該商趕緊捆運旋據該商黃
正泰等稟請護照以便沿途護運亦經刷備按船給發
茲於八月初一日起各商陸續捆裝投掣於八月二十
八日將黃正泰等先請之二萬引掣竣九月十二日將
黃正泰續請之四萬引掣竣十一月二十日將包振興
等續請之一萬引掣竣均經先後全數出場

道光十八年海州分司童濂奉鹽政札據淮南商人黃正
泰請運舒桐江岸引鹽一萬二千引又據和福盛包振
興請運八千六百引黃正泰續請六千引飭催重趕運

俾資濟銷等因均經按垣分派鹽數飭令赴垣趕緊捆運嗣據該商等陸續捆裝投掣自本年六月初十日起至七月二十五日止將該商等請運之四萬八千六百引全數掣竣出場

道光十九年海州分司童濂奉鹽政札據江運商人黃正泰請運江岸引鹽二萬五千引包振興和福盛洪箴遠包元泰等請運江岸引鹽四萬八千一百引該分司卽便催重趕運遵卽按垣派鹽飭令捆運茲自七月十三日開掣起八月二十六日止將該商等先後請運之七萬三千一百引均已掣驗完竣陸續運壩

咸豐三年七月運司郭沛霖詳江運八岸及天長一縣向屬淮北引地以其與淮南引地錯雜奏明由商認運以固藩籬歷因商運未能足額卽以溢請票鹽撥補道光三十年淮南亦改行票鹽將江運八岸及天長一縣復改歸票販自運署司復查本年淮北鹽務引積課懸轉瞬造報屆期大有虧短課額之慮若江運各岸任聽江路阻塞不爲籌辦不但廬滁等處有淡食之虞且何以疏滯引而裕

國課按兩淮鹽法志八岸舊章本由湖運一由壽州之石頭埠陸運經瓦埠抵廬州一由正陽關換小船入山河

抵六安陸運至舒城一由高郵湖抵天長至汭澗陸運
抵來安滁州刻下江路不通似可仍照舊章暫由湖運
以利疏銷而濟民食所有見在辦運各販如願領運應
由海分司廣爲招集認引徵課趁此湖水未落之先趕
緊運出儻竟觀望不前亦宜暫派官運免致積壓惟前
據海分司稟稱正陽臨淮等處閒有土匪應否派委幹
員多帶兵勇開導護運且旣繞道行走腳價自必加重
其運費如何籌墊課本如何酌減鹽價能否緩給回課
能否速清應逐細妥議以期有利無弊業經札飭海分
司釐定章程開摺呈核各在案茲據該分司稟稱查淮

北江運八岸額銷八萬餘引歷綱從未請運足額壬子
一綱片引未請旋經淮南總局議將江運各岸統歸淮
南食岸行銷迄今尙無商人認辦口岸虛懸日久必至
盡爲私鹽侵灌且將來奏銷造報全須票稅撥補亦屬
有妨庫儲本年開辦癸丑新綱各販因壩鹽壅滯銷路
不通尙未認足歷綱四十六萬之數當經趕緊設法招
徠務期認運足額至江運各岸尤須運鹽接濟未便置
口岸於不問見在江路梗塞自應仍由湖運惟湖運改
爲江運已閱數十年之久如議仍由湖運其運道之難
易遠近今昔情形不同必須委員確切勘明並查明由

水登陸運鹽有無窒礙方能核計成本通盤籌畫辦理
事雖由舊實與枵始無異目前商販必以湖運爲畏途
自須官爲倡導俟辦有眉目方可招商查道光十三年
因江運各商倒乏前運司委候補各員捆運淮北壩鹽
赴合肥舒城無爲廬江巢縣等岸濟銷其時係由庫支
給運腳其鹽係北商欠課封儲在堆無須給價統俟到
岸售鹽歸繳庫本今事勢懸殊鹽由場運不能不給池
丁鹽價當此庫款支絀之際運費又無款支墊辦理殊
形棘手擬請試辦四萬引鹽價運費等項設法先在癸
丑綱經費項下徵收墊支以八千引爲一檔分作五檔

請委候補經知大使五員領辦由場運赴西壩儲備並
請遴委明幹之員馳赴各岸勘明道路以便籌議如何
分運該岸濟銷所有應完錢糧查照歷綱商運科則參
酌辦理並援照道光十三年官運之案俟到岸售出課
銀解繳儲庫並墊支鹽價運費等項提還歸庫再淮北
淮南見已一律行票所有此次儲備江運之四萬引應
請另給癸丑綱照票四千張以便發給各員赴場憑照
請運赴岸銷售亦屬簡便經漕運總督福濟批允

謹按是年江甯失守漕運總督兼管鹽政雖批定此
案仍未舉行

同治五年署鹽政李鴻章札發淮北江運認岸章程

一認運宜專也查合肥廬江無爲巢縣舒城桐城滁州來安八岸係淮北江運引地前令買食南鹽本係暫時權宜之計見查各該岸民間食慣大粒北鹽南鹽不合銷路以致北私充斥幾成廢岸自宜改復舊制仍運北鹽由江達岸以利民食而裕課餉惟地與淮南皖岸到處毗連若行票法易壞藩籬應仿上元江甯食岸之例招徠殷實大商取具的名的保將各該岸分認辦運以專責成

一引額宜減也八岸引額共計七萬四千二百六十四

引停運日久今昔情形不同值此勘辦伊始自宜從少酌定應照各岸額數先准認運五成俟辦有成效再行逐漸加增庶免壅滯之慮

一科則宜定也舊定江運正雜課較淮北正鹽略輕易滋弊混今應令認商前赴西壩鹽棧照淮北刊章定價買鹽應完課銀等項與商販一律五河正陽之釐淮關之稅亦令隨課呈繳海分司收納給予大票護運註明江運字樣其經過淮南地界並令照皖岸引鹽酌完大勝金柱等下四卡釐金准俟鹽運到岸後按月彙繳督銷委員解充金陵軍餉餘卡一概免收以輕商本

一夾私宜查也北鹽自清江下駛沿途私鹽馬頭甚夥
深恐船戶夾帶肆意影射不可不嚴防其弊應於高郵
設一掣驗卡專查夾私重斤淮北大票本截平上去入
四角擬由西壩卡員掣驗截平字角高郵卡員掣驗截
上字角出江時由瓜棧抽掣出江後卽派大勝關掣驗
截去字角到岸後由督銷委員掣驗截入字角如有夾
帶隨時提鹽照例懲辦重斤照全船扣算註明護照到
岸提鹽充公

一運道宜勘也合肥廬江巢縣無爲舒城向由裕溪口
進口分途撥運桐城過蕪湖進三江口滁州來安進儀

徵縣境之段腰口見在各該處河道是否暢通能否一水直達毋庸換船起駁冬令水涸是否阻塞有無應行變通之處應由魏道派委前往詳細勘稟明辦理一侵銷宜禁也鹽運到岸擬由大通局魏道就近督銷其路遠之處由魏道稟派委員駐岸協同地方官認真經理北鹽粒大色潔不但易侵淮南皖界稽查不嚴必致上灌楚西於淮南大局有礙故成本售價宜較淮南稍重見在廬江等處北私聞售每斤八十餘文今岸價定以每百斤四兩祇合五十餘文足收敵私暢銷之效儻敢暗中跌價及有越境侵售情弊察出從重究辦

同治五年六月署鹽政李鴻章批皖岸招商局道員魏承
樾稟據勘淤來等岸運道披閱繪圖尙屬明晰惟加稅
北私祇可暫時權宜該八岸總以規復江運爲正辦前
發江運章程飭令招徠至今尙無人認或因本重利微
商情尙形觀望且查北私售價每斤並無八十餘文之
多則官價亦宜酌輕方足收敵私之效惟不可輕於楚
西兩岸致滋侵灌茲本署部堂復加酌核所有江運北
鹽不盡由皖岸之下四卡經過應將荻港大通兩卡鹽
釐免其完納減輕銀一兩四錢六分六釐以一兩二錢
貼於售價將來江運每百斤定售三兩七錢以二錢六

分六釐貼於商本如此量子變退則官價輕而獲利厚
認運或可踊躍仰再妥招股商分別認辦

同治七年正月運司李元華詳奉批前署司詳江運認岸
朱衣吉等稟退舒桐等案緣由奉批前認江運各商紛
紛稟退其爲無力辦運已可概見此等巧滑之商本不
足靠應卽一併斥退以免誤公惟該八岸食慣北鹽勢
難強銷南引而北私抽釐流弊極大前據該署司稟擬
畫分南北各歸票運此亦權宜之善策仰卽移商皖局
查明該八岸何岸必須運銷北鹽何岸暫可令食南鹽
確切議詳卽將南北票鹽分運濟售停止抽釐講求緝

私庶皖岸藩籬可期保固等因當經前署司移知大通
總局體察情形據議覆滁州來安人煙稀少儘可暫行
擱置其合肥舒城巢縣廬江四岸皆係食慣北鹽之地
無爲地方切近皖岸似可令食南鹽然私蹤易入刁販
易混不如一律票運北鹽卽以無爲爲南引藩籬惟桐
城一岸居大通之上游以樅陽爲來路雖八岸之巨擘
實皖岸之關鍵應令暫食南鹽仍由大通總局隨時分
銷以固引地滁州來安擬暫作廢岸又查合肥西北兩
鄉私梟充斥同時舉行官運非流於廢弛卽失之操切
似須因勢利導由近及遠庶可收擴充之效至此項票

運不必另行招商查皖岸春秋兩綱見定七萬二千引
歲計不能盡銷擬請仿照上年借運北鹽章程先行試
辦卽於皖引六百票內分撥一百票飭由各商自行稟
請給咨辦運將來辦有成效再請增額招商自係順易
至八岸中應設緝私分銷掣驗各局卡俟定案後議詳
經鹽政曾國藩批查淮北江運八岸廢弛已久此時旣
無商認據議在於皖岸六百票內撥出一百票試行票
法亦權宜之一策滁來兩岸引額本屬無多暫從緩辦
未始不可桐城一岸居大通上游旣以食南鹽爲便仍
由皖局撥銷南鹽以固藩籬其合肥舒城巢縣廬江無

爲五岸准如所議運銷北鹽惟既歸票運不如認岸之
有責成若由各商自赴西壩買鹽稽查難周易致弊混
應仿照前年借運北鹽由棧撥販章程辦理查皖鹽一
百票計一萬二千引可分作四批辦運每批約需本銀
一萬五千餘兩卽由運司在於閒款項下提撥發交瓜
棧轉解海分司循照舊章買運北鹽存儲瓜棧挨輸出
售其課釐一切悉照淮南科則庶與皖岸眾商成本一
律於皖章不致窒礙售出鹽價於歸還運庫借款外所
有盈餘儘解北征糧臺充餉惟北鹽色潔粒大不特易
侵皖岸且易上灌楚西棧價本較南引稍昂售價亦宜

較南引略貴見在皖岸售價每百斤新減二錢計售二兩八錢此項北鹽到岸應仍照舊每百斤定售三兩統歸大通局督銷以一事權

謹按桐城一岸向行北鹽既而改食南鹽嗣仍行北鹽

同治七年二月瓜棧道員程國熙稟江運八岸分食南北引鹽一案奉文於皖岸六百票內分撥一百票運行北鹽由大通局督銷仍照上屆北鹽南運章程由瓜棧發販所有錢糧關稅釐捐等款悉照南鹽科則辦理等因業經遵札分移大通督銷局海州分司遵照議覆核辦

查皖岸見行丙寅秋綱三百票已運二百餘票所餘無
幾定買北鹽應俟丁卯春綱開辦後分撥五十票丁卯
秋綱開辦後分撥五十票共成一百票以符原案仍照
上兩屆章程辦理惟上屆借運北鹽係一時權宜之計
此次皖岸分撥常年如此必須定立經久不易之規方
可行之無弊且就照南鹽科則計算則未便於淮北見
行每年二十九萬餘引內扣除議由海州分司派員赴
場捆運餘鹽堆儲西壩以便瓜棧委員分批運解但查
淮北池鹽係由曬埽而成與淮南之攤灰淋鹵鰲煎不
同向來小滿後鋪池曬埽卽足一綱之用所謂小滿十

八埭也過此則產鹽不旺且須趁水趲運至西壩堆儲
方不致有糜費此次分撥江運各岸食鹽每年一萬二
千引在瓜棧則分爲春秋兩綱各撥六千引在海分司
則不能不於小滿後預備一年應銷之數且赴場捆運
餘鹽既可藉免透私又不占礙淮北正額而成本較輕
復於盈餘充餉稍有裨益似可照此辦理經鹽政曾國
藩批江運八岸本在淮北二十九萬餘引正額之內惟
此次係屬試辦且係照南鹽科則完納南課據請由海
州分司派員赴場捆運餘鹽不歸正額事屬可行

同治七年五月皖鹽招商局知府李興銳條陳辦運北鹽

事宜 一每綱五十票在於皖岸六百票內抽撥本應
令商自認以示公平旋慮商多票少動需掣籤其中一
二票小商本少力弱不勝分顧之煩必開頂替之弊見
擬酌派十花名承運五十票如蒙批准再行飭商遵照
至丁卯年秋綱五十票仍由卑局派運屆時酌稟 一
秋後巢湖水落鹽船笨滯擬請將丁卯春綱北鹽五十
票酌定日期移棧先行發販 一五岸去大通過遠分
銷不能不設局試辦不能不省費鹽船皆由裕溪進口
至運漕五十里至廬郡三百一十里中隔巢湖其勢又
難一處兼顧五岸查運漕原設有緝私卡帶銷和含南

鹽司事勇役皆備茲擬派一員分銷無爲巢縣廬江三屬兼管掣驗北鹽事務應請月給該員薪水銀二十四兩又擬派一員於廬州府城設局分銷合肥舒城兩屬應請月給薪水銀四十兩司事一名月給銀八兩局勇四名各月給銀四兩二錢伙夫一名月給銀三兩油燭紙張雜費月給銀六兩另需幫辦文案解餉一員暫由大通總局抽派 一羅昌河中梅河合肥三河等卡抽收北私鹽釐請自設局官銷概行停止仍責令稽查夾帶停釐之後應於巢縣之柘皋無爲之襄安鎮合肥之大興集舒城之西北嚴行緝私方爲正辦但勦始之際

民情未通蹊徑未熟操切行事其弊必流於巨梟把持
小販勦襲上下之情隔截敷衍與認真皆無益也擬先
剴切示禁責成地方官申明約束不因停釐而縱私不
因奪利而賈害斯爲不負講求緝私之義 一北鹽潔
白味厚民間有一斤足抵南鹽斤半之說卽今皖鄂腹
地受害已深區區數場之產取之無盡價復不昂此理
殊不可解前奉憲批北鹽到岸每百斤定售三兩雖較
之廬郡北私見價約貴二錢而所以保固南引之法權
衡至當謹俟開辦後如何情形再行稟請增減抑更有
請者從前北私南侵多係旱道一開江運更難清查影

射最忌開端夾私誠難弛禁擬請通飭瓜棧下關嚴密
掣驗加意防維庶不因五岸權宜之舉貽楚西皖無窮
之患經鹽政曾國藩批據詳無爲巢縣廬江合肥舒城
五岸江運章程第一條丁卯春綱五十票擬在皖引內
由局酌派厚吉昌等十花名分別承運該商等皆係皖
岸大商資本旣充心志又一較諸籤掣小商本微人雜
動輒賣票自可省紛擾而專責成應如所議飭遵將來
丁卯秋綱五十票亦可仿辦屆時再由該守察酌稟奪
第二條皖岸南引銷數疲滯丁卯春綱應暫緩開其江
運北鹽旣恐巢湖秋後水落挽運維艱自應准其先運

惟見在淮北銷數較暢壩存舊鹽無多瓜棧應備北鹽雖經稟定尙未往運候飭運司程道迅速撥款解交海分司趕買運棧免致貽誤第三條五岸距大通較遠擬在運漕廬州兩處派委王德壽譚慶餘設局分銷應准照辦薪水等項如數開支惟北鹽運棧尙需時日設局尙可略緩以節經費應俟北鹽將次到棧由程道知會該守再行往設不遲第四條抽收北私鹽釐各卡俟設局定有日期卽由該守專稟以便札飭牙釐總局概行停止一面刊刷禁私告示發局張貼停釐之後以分設卡所講求緝私爲第一要義私梟雖橫未嘗不畏官法

况向販北私之人逢卡完釐尤非積慣梟徒可比若能
招之使來改販官鹽更得化梟爲官之美意此中樞紐
全在卡員任用得人該守須先訪察人材稟明派辦各
該屬民風强悍不可稍涉大意第五條北鹽售價祇可
貴於南鹽此一定辦法至船戶夾帶北私尤爲南鹽之
害除札瓜棧下關認真掣驗外其前次借運北鹽曾在
清江至揚適中之六漫間派員抽掣此次北鹽運棧仍
應由司揀派可靠之員前往該處查驗抽掣如有夾私
重斤立提充公另單所陳南引銷滯自應設法整頓惟
州縣事繁不能以銷鹽之事責之况衙門丁胥向視鹽

商爲魚肉一經地方官之手往往事未辦而先講費此等惡習素所深恨凡疏銷事宜仍應由該守熟籌隨時稟辦

同治七年六月瓜棧道員程國熙詳酌議江運北鹽章程八條 一捆運餘鹽查淮北票鹽從前每年行運四十六萬引兵燹後各岸銷市疲滯每年全綱僅運二十九萬餘引統計各場額派之外餘鹽尙多見奉捆運北鹽行銷皖岸應請卽捆太平中富西臨等局餘鹽擇其色潔粒大者查照前年南運章程給發鹽價 一預籌成本查同治四五兩年北鹽運南案內報銷冊開成本場

鹽鹽價包索句損運壩水腳等項每包需錢六十八文
五毫委員薪水司事辛工書役飯食等項每包需銀一
分五釐每南鹽一引共計成本曹平銀三兩二錢有奇
此次捆運北鹽成本不相上下應由海分司先行籌款
墊給其由浦運瓜水腳及進棧擡力添換包索等項應
由瓜棧墊發一俟運竣核實報銷除墊發銀兩卽在售
價之內照數提出發還歸墊外所有盈餘悉數解赴北
征糧臺充餉至捆鹽斤重仍照上屆西壩車運至清江
拋撒半斤清江舟運至瓜棧涵耗一斤邳包蒲厚加重
二斤堆倉待售涵耗二斤照淮南庫砒每包計重九十

一斤半內除水陸拋耗一斤半外實重九十斤委員押運到瓜按包交斤如有短少應責成押運委員賠補一清江交鹽查自軍興以來南北商貨不通清江一帶絕少寬大船隻卽或閒有小船又係破損居多不堪裝載此項南運鹽斤應由瓜棧選派委員飭雇淮南裝鹽船隻押送赴浦由海分司將鹽裝車發旱運赴清江臧家馬頭交給委員稱收領運一分批起運查同治四五兩年委員押運北鹽每批一萬二千包以冀節省薪水第鹽數旣多船亦加多委員一人耳目難周船戶每多偷爬盜賣情事此次捆運北鹽應飭派委員押運每

批定以八千包鹽數較少稽查易周委員薪水銀兩卽由海分司照數支給彙入成本案內報銷 一給照護運查鹽船裝運鹽斤例應填給護照以備沿途關卡查驗此項捆運北鹽應請於清江受載之後每船給發護照一張填明某局鹽若干包另給艙單填明船戶姓名艙口包數以便稽查而杜夾帶 一明定關稅查上屆兩次北鹽運南應完淮關鹽稅船料均俟運竣之後照數彙解此次自應循舊辦理惟關吏差役人等遇有鹽船經過每多勒捐更恐誤會江運思復舊規應請咨明淮安關部一切仍照上屆南運章程關稅每引三分七

釐船料樑頭六尺者納正單銀一兩六錢五尺者八錢四尺者六錢四分每船料銀一兩另繳火耗補平銀一錢二分六釐二毫八絲每年祇報一次平日驗單放行所有稅料銀兩應由瓜棧彙解淮關並請嚴飭關吏差役人等如遇此項鹽船抵關務須隨到隨驗立即放行不准留難致誤行運 一嚴禁黑費查從前南商承辦江運鹽務各衙門及地方文武員弁書役兵丁人等均 有陋規黑費卽車腳船戶亦多勒索把持此次官運北鹽行銷皖岸餘利充餉實與商運不同第恐鹽務地方各衙門及沿途營汛妄生覬覦仍蹈從前江運故轍應

請通飭曉諭嚴行示禁 一瓜棧發販仍照上屆章程
定交單後赴總局繳價照上屆減定之價每包收足大
錢一千二百六十文又運腳錢一百四十文由總局扣
除內河釐捐各款餘錢彙總解棧隨時牌示以繳價之
先後爲過掣之次序不得爭先恐後應完錢糧及揚由
關稅卽由瓜棧於解到棧內之錢照時價易銀批解仍
專案報明查考經鹽政曾國藩批第一條擬於太平中
富西臨等局捆運餘鹽既不占淮北之正額卽以籌餘
引之出路所辦極是惟上屆所捆次鹽居多各岸噴有
煩言而鄂省之滯銷卽以此爲口實此次江運皆係食

慣北鹽之岸必須擇運色潔粒大者方合銷路應卽速移海分司遵照第二條成本運腳等項既與上屆不相上下應准照辦其滷耗斤重西壩給拋撒半斤運瓜給滷耗一斤邳包加重給二斤亦與前案相符惟堆倉待售二斤上屆及淮南定章均無此名目且北鹽色白已勝南鹽將來總恐占銷南引若再加給滷耗更覺偏重礙難准行第三第四兩條前此押運委員係由海分司選派此次因清江一帶雇船不便改由該棧雇船往裝應派委員自應由該道揀派辦運以雇船爲最難最要之事如委員有剋扣水腳任聽船戶夾私影射情弊察

出定行嚴參第六條淮關稅料應由瓜棧循舊彙解第七條江運黑費請頒嚴示飭禁候卽咨明淮關一面刊示另發餘悉照所議辦理

同治七年七月運司李元華詳據淮南總局遵查皖鹽護照自奉歸併卑局以後亦係查照楚西各岸之例由憲轅申請督鹽憲統行飭發下局由局隨時填明花名引數申送蓋印轉發商護運凡涉皖岸引地均可任其行銷並無區別今旣奉定於皖岸六百票內撥出一百票專運北鹽行銷江運之合肥舒城巢縣廬江無爲五岸自應畫分疆域俾免侵灌之虞卑府悉心核議此項北

鹽應於護運照內另行加蓋戳記註明此票係運北鹽
專銷無合廬巢舒五岸如有越境行銷卽以私論由運
司委員前往六漫開設卡掣驗並錄呈戳式經鹽政會
國藩批允

戳式

此項護照奉准專運北鹽行銷

合肥舒城巢縣無爲廬江五岸

地方如有越出該五州縣境界

者卽以私論此註

同治八年二月皖鹽招商局知府李興銳稟奉札據天長

縣景令稟岸商儲豐裕汭澗分店延未遵飭移退查天
長科則較輕汭澗一店不特侵銷六合並易上侵皖界
該縣謂天長口岸之官鹽半成滁來全之私鹽洵是確
論早經曾爵閣部堂飭令將該店移退三十里迄今半
年之久迭經該縣飭催乃該商一味遷延實不成事仰
候札飭淮運司勒令刻日退設不准再以委勘藉詞任
其久宕並行龐道一體移催見在皖岸銷數甚滯滁來
兩岸既不運北鹽自應設法籌運南鹽以濟民食北私
來源亦以滁來爲捷徑能將滁來藩籬保固於江運亦
似有益並候札飭皖局妥酌稟辦至地方官向有督銷

之責見在新章雖不計考其疏銷緝私等事該縣自應隨時顧及不得稍存膜視亦不准任聽胥役向商店需索等因伏查滁來兩岸本在江運八岸之內北鹽是其習慣南鹽不合行銷卑府原擬俟廬屬五岸辦有起色時再圖規復惟該兩岸行銷官引應歸運漕局兼辦運南鹽須由全椒運北鹽須由巢縣其閒概係旱道不能撥放成票之鹽卽車載肩挑轉運亦復不易此外必由長江進口徑行六合始抵該境而越國鄙遠又非運漕一局所能控制見當整頓鹺章之際未便以引懸岸廢畏難苟安置藩籬於不顧與其籌運南鹽反其所好似

不若籌運北鹽導以易行計惟有添設緝私卡所以絕私蹤招開鹽行子店以濟銷市並將桐城一律稟辦庶八岸不致偏廢舊制可期全復矣經鹽政馬新貽批滌來兩岸本係江運北鹽引地前批飭令設法籌運南鹽原以該兩岸既不運北鹽不能不變通酌辦茲據查明籌運南鹽反其所好仍請撥運北鹽自是正辦惟滌來引岸廢弛已久私鹽任意充斥幾不知官引爲何物整頓之始水販未必爭趨且運漕分局撥鹽運赴該處均係旱道轉運不易成本未免加增該兩岸應否添設北鹽分銷局諭令皖商在於瓜棧已到北鹽內撥出若干

票逕由長江進六合口以達該岸照章報由分局挨輪
售銷則運道旣形便捷銷路或可疏通較之招開鹽行
子店似乎更有把握惟分局及緝私卡應設何處方爲
扼要仰候接辦委員到後會商妥議詳覆察辦其桐城
一岸該守迭次稟詳意欲保固皖岸藩籬是以仍令暫
食南鹽昨閱桐城縣報文似此岸究以食北鹽爲便應
俟滁來定案後察看北鹽銷數另行專案稟辦

同治八年四月皖鹽招商局道員袁保慶稟查滁來與天
長鳳定毗連北路之私鹽賤於江運之官鹽天長之官
鹽則更賤若於滁來設局出售非將鹽價減之又減均

不足以抵之民豈肯舍賤而食貴而減價出售不惟商人
不願尤恐巢無全椒等屬與滁來相近之處民間貪
食賤鹽潛行買取則滁來之官鹽轉成巢無全椒之私
鹽而該州縣應銷之鹽必更形遲滯是利未必果能興
而害卽隨之矣且合舒兩屬據廬州分銷局龔令蓮芳
面稱自七年十月初一日開局至三月底止僅銷鹽三
票有零三月閒派勇赴上派河緝私私販見勇皆欲毆
打該勇卽轉身而回自此以後不敢再派人赴集鎮緝
私前招開子店七十家見因私不能緝已閉歇三十家
等語其滯銷情形已可概見是名曰復舊岸而尙無把

握焉敢計及滁來也至於桐城較易於滁來祇因皖岸以南鹽爲大宗銷路以安慶爲最暢亦未敢驟言復岸致引北私有損南鹽此時宜統八岸之私皆設法緝之將見辦之五岸極力整頓俟各局穩固再議擴充否則務廣而荒深虞顧此失彼譬如甫學走者未能穩步遽欲奔馳躓蹶之患必處處見之矣又稟合肥一帶私鹽充斥三角寺定遠縣皆其來路於梁園設卡可以截三角寺私鹽之路於分路口設卡可以截定遠私鹽之路然該處距廬州或八十里或七十里且係旱道設卡均非易易職道擬親往查看斟酌辦理又訪聞桐城懷潛

各境之樅陽鎮義津橋練潭鎮青草壩孔城集錢家橋
破崗集湯家溝石牌鎮等處皆私鹽出沒之所已派兩
淮巡檢惲洪年帶礮船一隻往來巡緝並飭詳查桐城
情形及由江進口至桐城左右均與某縣交界細繪一
圖以爲復桐城引岸地步經鹽政馬新貽批滁來兩岸
規復雖難而久任廢棄亦殊可惜仰俟五岸整頓有效
卽行籌議擴充其桐城一岸俟惲委員查復到日酌議
稟奪至梁園在廬州東北七十里係赴定遠大路分路
口在廬州西北七十里係赴壽州大路梁園設卡可截
定遠之私分路口設卡可截三角寺之私原稟所敘路

徑稍有錯誤該兩處非有重兵駐劄斷難設卡仍應先從廬州南鄉辦起爲妥

同治八年六月鹽政馬新貽批皖岸督銷局稟桐城分局既據查明設在上樅陽地方距出江二十里尙非濱江不致上侵鄂岸准其照辦所擬局卡薪糧等銀准照摺開支設局用項如數准銷大關之西既有崎嶇小路走私應須巡緝准添勇六名

同治八年八月皖岸督銷局道員袁保慶稟據商稟江運八岸昔年原有定額被賊匪擾亂後私梟充斥竟成廢岸前奉爵閣督鹽憲曾諭示疊飭局招商認運以原額

照減五成以八岸分爲上中下三等配搭分派其桐無爲上等合廬舒巢爲中等來滁爲下等如認上等者必將中下搭配其時曾有一二商請認皆欲辦桐無餘岸均不敢認因有包釐課之責中止去年秋閒蒙前局憲詳請試行北鹽在於丁卯春綱南引三百票內撥出五十票派商改運北鹽赴合廬巢無舒五岸分銷計自去年九月開局截至今日將近一年之久僅售出三十餘票可見滯銷已極又桐城一岸詳請督鹽憲馬批准改復舊制行銷北鹽開局未及三月已銷二十票之多查江運八岸已復其六惟僅存來滁兩州縣近年民間所

食均係私鹽價祇二三十文一斤不等若以運漕分局之商鹽撥往資本過重售價懸殊虧累甚多各商自不願往惟有仰求俯念引地虛懸詳請試行官運則南北眾商可免派往等情職道謹擬試行官運章程呈乞示遵 一官鹽局擬添於滁州城內俟奉批後再飭委員赴滁查勘地方妥爲安設如有應添設分局之處由委員稟明酌辦 一試行官運爲減價敵私而設各處私價不同行銷官鹽必招開子店方漸推漸廣須使子店得有餘利踊躍樂爲又須使子店餘利不浮私鹽之價始能敵私各處售價同銷數按旬摺報總局 一官鹽

出售時卽拚票商所獲之利爲減價敵私之用 一官
鹽開運時由瓜棧雇船派員押運到滁譬如應運五十
票或分作三起或五起由瓜棧酌辦 一官運向無成
本所有官鹽鹽價運鹽船價係另籌公款撥存瓜棧運
一票卽付一票之價雇一船卽付一船之價俟銷鹽後
再照數解至瓜棧以資轉運抑令運司籌款令瓜棧墊
辦俟銷鹽後如數統解瓜棧以備環運均候鈞裁 一
每月銷鹽若干除局費外仍照釐金報效章程每票報
解銀七百餘兩每月應解若干由總局另備公文報解
月清月款惟卑局向章釐金解交軍需局報效交藩庫

此等公項無釐金報效名目應否專解藩庫候示 一
私鹽如日敵日少官鹽如日銷日暢應將售價逐漸加
增由該局隨時稟明總局核辦售價之盈餘卽同應解
之款項一併報解儻委員等私自增價致生弊竇一經
查出卽詳請究辦 一官鹽赴滁來由瓜埠進口走六
合一路瓜埠距瓜棧僅數十里鹽船不能由金陵卡掣
驗查瓜棧上游三十里泗源溝有一掣驗卡官運鹽船
宜由此卡掣驗祈札飭該卡認真辦理以免灌包夾私
重斤等弊 一滁州通江之河水大時船可直抵該州
城下水小時船祇能抵距該州五十里之烏衣鎮若由

該鎮再運五十里旱路旱腳之費必數倍於水腳運腳多一分卽售價增一分恐於敵私有礙宜趁水大時趕緊多運於該州設棧堆儲待銷 一大江之風波無定鹽船行江不能無萬一之慮儻鹽船猝遭風波之險或全船淹沒或淹沒數百包卽稟明備文由瓜棧補運補運之鹽銷售後所有兩次鹽價船價卽以所售之銀一清解如不敷用卽扣應解之款酌補如未用完卽隨應解之款彙解 一此時藉官運減價敵私如以後滁來一帶私鹽淨盡可撥商鹽卽稟明酌派票商運銷以全江運八岸之制經鹽政馬新貽批查江運八岸已復

六岸僅滁州來安兩岸尙無商運廢棄殊爲可惜該道擬請試行官運係爲規復引地起見事屬可行惟檢閱摺開各條有必須詳加參酌者試爲縷晰論之第二條試辦官運應與商運一律曾飭閩部堂刊章詳載並疊次具奏有案誠以官運成本售價較商稍占便宜商運卽爲官運所害今滁來東接浦六西南又與全椒和州含山處處毗連該處售價過輕勢必蔓延商岸各岸運商必將有所藉口第四條官運引數必須預先酌定方可轉行瓜棧暨海分司照數籌辦來摺內未據議及僅言譬如五十票或分三起或分五起若定五十票則有

六千引之多查志載滁州額行小引四千三百四十六引來安額行小引二千二百三十引折實大引共祇四千三百八十四引可見當時定額之時並非暢岸今兵燹之後戶口大減焉能銷足六千引祇可先行試辦二千引應再確議稟核第五條官鹽成本尙易籌畫見在丁卯秋綱北鹽業將全數開江可卽在於此項盈餘內指撥應用惟每千引自場運至西壩由壩運至瓜棧須先飭發海分司鹽本銀若干將來自棧運岸又須水腳辛工及委員薪水銀若干均應預先核算稟明辦理第六條釐金係報部之款不論官運商運銷一引鹽完一

引釐自應循照舊章仍解軍需總局至報效一款可解
藩庫另存候撥其餘各條均尙可以試辦總之該道請
辦官運專主減價敵私究竟能否奏效尙無把握事貴
慎始講求不厭精詳也

同治八年十一月皖岸督銷局道員勒方錡稟滁來試行
官運謹就袁道前稟章程量爲變通開具清摺呈請鑒
核一案經鹽政馬新貽批第一條官鹽售價本不宜輕
減惟滁來久被私充早成廢岸值此刪辦伊始據稱照
商運二兩八錢斷難銷售尙係實情姑准量予酌減但
須查明天長江浦六合各認岸每百斤出售若干滁來

之價似宜較認岸略重皖岸略輕酌中定議無論何處
子店售價總須一律不可稍分軒輊卽由該道轉飭委
員前往確核情形議稟察辦第三條鹽本運費等項每
引實需若干仰候札飭瓜棧海分司分別核算遵辦第
六條滁來引鹽由瓜埠進口既不經過金陵掣驗卡查
泗源溝曾據食岸督銷局設有掣驗卡應如所議卽飭
該卡委員認真抽掣第八條官運非商運可比儻遇淹
消應否補運且俟臨時再行酌辦毋庸預議第九條全
椒一岸與滁來最爲切近該岸本係南鹽引地此時久
爲北私充斥若仍聽其自然誠如所議將來官運必受

侵灌之害准其暫食北鹽以廣銷路俟南引暢行仍應復還舊制第十條局員據議月給薪水四十兩未免過優應減爲三十二兩此外幫辦司事人等均准照支其餘各條尙屬妥洽悉照所議辦理

同治八年十二月海州分司運判許寶書稟查上屆飭捆江運案內奉飭籌議運費等項每引約需成本若干遵經分晰議開成本清摺詳經瓜棧程道轉詳憲鑒在案查滁來兩岸此次試辦官運鹽引卑職業經飭場重運所需運腳鹽價等項悉照歷辦江運章程辦理自場運壩由壩運至清江臧家馬頭交鹽所有鹽價水腳棧租

摺工車力及領運交斤各委員薪水等項一應在內統
計每引實需曹平寶銀三兩一錢九分有奇以上各項
向由卑庫暫行籌墊俟瓜棧售出鹽斤即在鹽價內扣
出照數解還歸款其自清江運瓜水腳等項均由瓜棧
籌款墊發

同治九年二月瓜棧道員薛書常稟奉札催以滁來春市
急需售鹽飭卽催委趕運一俟鹽運到瓜卽先運頭檔
七百二十引將起程日期報查等因查滁來官運二千
引據海分司呈報已於二月初一日圓載開行指日卽
可到瓜水腳急須早定以便委員領運惟事屬剴始既

無成案可稽而水程險易遠近疊加詢訪言人人殊礙難草率定議不得已委員前往察勘見據回稱由瓜棧至滁州實在水程三百三十里較瓜棧至清淮水路約少五六十里而六合以上河水淺涸必須換小船起駁全用人力推挽方可到滁水腳數目似難過於減省擬照淮北運腳每包一百二十文酌減十五文照一百零五文發給如能以駁船直抵滁州即可毋庸再議如烏衣至滁州河水乾涸必須改用陸運則腳費較之水程勢必倍蓰已難照水腳核計而途中拋撒偷竊照應尤須周備則由瓜棧至烏衣水腳擬改每包九十文開支

其由烏衣陸運腳費則由押運委員會同滁局委員公
同雇覓人夫兩相照應庶眾擎易舉照應可期周密而
運腳亦不至過於糜費事竣據實開報仍由瓜棧墊支
儻至三月以後或春雨沾足河水盛漲則可不作是議
矣經鹽政馬新貽批准照辦

同治九年二月鹽政馬新貽批皖岸督銷局稟滁來售價
據稟太輕則侵灌見行引地稍重則小民貪賤食私與
本部堂前次批示意旨脗合既據酌中核議約算成本
尙屬有盈每百斤應暫定二兩三錢以廣銷路仍俟試
行三箇月後再由該道察看銷數之暢滯議稟定案各

處子店統照局價一律出售

同治九年四月鹽政馬新貽札江運八岸係北鹽引地從前本歸南商認辦李爵部堂任內曾經飭局招商迨七年間皖局因無商認稟請變通辦法在於全綱六百票內先後撥出一百五十票試辦北鹽目前銷路逐漸疏通而舊制尙未規復見有新商來轅稟請將該八岸一律包認本部堂以皖岸各商業已承運於前此時概歸新商認辦則原運各商未免向隅未據批准該八岸果由原運皖商將原撥引數集資包認則悉照見辦章程認岸包課於引額商情均無窒礙如原運商人不願承

認將來另准新商認辦各該商無從後悔也

謹按是年設局於滁州城內試辦官運由局員赴儀
棧請運北鹽分銷滁州來安口岸是滁來二岸爲官
運廬巢等六岸爲商運至光緒十七年仍無商人承
認滁來亦無新商包認八岸蓋以滁來銷引雖漸暢
旺尙難定數也

同治十一年七月鹽政何璟批皖岸督銷局稟皖岸自桐
城一岸改銷北鹽銷數較暢據請在於南引內添派改
北係爲酌盈劑虛起見應如所議卽在已銷戊秋南引
內撥出五十票改運己秋北鹽惟初運北鹽時商情尙

覺畏難是以改撥之引悉由局派今則北暢於南情形
與昔不同此次添撥之引應由該道傳集各商當堂掣
籤以昭公普仍將掣定商名開摺報查

同治十一年九月皖岸督銷局道員勒方錡稟向章北鹽
應運桐城運漕口岸係由職局酌數按成輪流分派茲
據各商稟請於籤內註明口岸卽歸一起掣籤當經如
稟註明歸於一起掣定下次開綱照舊輪派以符定章
此次查核兩岸銷數酌以四六分成計籤四十枝內桐
城六成應派北鹽二十四票運漕四成應派北鹽十六
票經鹽政何景瑞批各商應分運桐城運漕兩岸亦經分

成掣定益昭公允另單所稱籤掣北鹽商販元昌發等緣另有南鹽難以兼顧請與籤歸南鹽之吉慶和等互相調換既係彼此情願並准照辦

光緒十二年十二月皖岸北鹽運商慶豐泰等稟皖岸初定章程春秋兩綱額行七萬二千引內撥二萬四千引運行北鹽照南鹽極貴呂四牌價由棧發售是科則雖與南鹽相等其成本每引暗增一千四百餘文之多見在呂四牌價每包已減爲一千七十七文另加運腳北鹽仍照一千四百餘文完繳北鹽成本以內河各捐爲大宗當定章之時每引按照捐數一千二百餘文歷年

以來南鹽已奉裁減南北臺捐及漕院各捐見每引僅繳四百餘文北鹽仍照一千二百餘文完納且南鹽繳價每票僅先繳鹽價五成六百千文過掣定售時方找繳尾款北鹽則於派委時卽將全價連同津貼水腳釐金各捐一併繳清計一千七百餘千守待掣運暗中銀利占攔更形喫重光緒四年蒙飭運棧憲會詳有請將每引可減之款五百五十四文一半歸公一半給商之議嗣因

陵工洋債需款孔殷因而中止數載以來未敢復嚆無如皖岸自奏加新引後北鹽加增一萬二千引之多銷路壅積

前此一年可以銷竣者須守至年半方可售清存岸之鹽將近二百餘票前鹽未銷後鹽又至成本愈難轉輸且北鹽各岸均係鄉鎮無倉堆儲無地屯積在船守住風火堪虞費用較南鹽日增成本較南鹽日重其赴岸河道又皆山澗淺狹每遇冬春水涸駁價擡力種種虧耗已屬負重難支詎意今秋銀價忽又大減每兩祇兌制錢一千五百餘文照前市價十減其二商等在岸鹽價均係售銀在淮繳價全係錢款每票又暗增成本五六十兩之數當此轉輸日滯成本日增拮据情形幾有岌岌可危之勢祈查照呂四場見減牌價數目及南鹽

各捐成案分別裁減再南鹽北鹽均一皖岸其繳價章程能准仿照南鹽分成緩繳則轉輸較易商力更可漸紓經鹽政曾國荃批此案前於光緒四年閒飭據皖岸督銷局議稟以南北鹽本利細加較量有南勝於北亦有北勝於南者且因軍需局撥款浩繁北鹽未減捐項飭仍照舊收解在案茲據稟皖岸加引後銷市稍滯自係實情惟銀價之跌南商同一暗虧此時棧中公用較前更鉅北鹽卽不減捐已無餘利解充軍需局儻再減捐勢必不支情形與昔年大不相同此層應毋庸議其所請緩繳鹽價能否分成之處候札儀棧會同運司議

詳嗣於十三年三月運司程桓生等詳據淮南總局詳稱查南鹽繳價向分前後五成各商於投環咨時每引先繳前五成鹽價錢五千文餘俟訂立交單後再將尾價找繳北鹽各商向於投咨時每引呈繳全價錢十一千二百四十文既有先後之分不無緩急之別嗣後北鹽繳價如照南鹽分別前後或於投咨時先繳六千文其餘五千二百四十文亦於訂單時找繳與南鹽辦法相符署司等查該局員等所議係照南鹽分成繳價辦法專紓商力起見惟江運北鹽成本係挪用海分司庫款與南鹽之專歸商運者情形不同前據該商等赴棧

具稟當經明晰批示見查北鹽鹽價內以墊發淶來全成本爲最鉅刻已墊至三檔之多共計銀二萬餘兩加以墊應每綱北鹽水腳及棧用項下不敷各款全賴此項鹽價接濟故僅發海分司成本一檔已不免積壓若如該局員等所詳分爲前後繳價於投咨時先繳六千文其餘五千二百四十文於訂單時找繳誠恐應墊各款棧中更難周轉經鹽政批旣據查明江運北鹽成本係挪用海分司庫款與南鹽之專歸商運者不同若分爲前後繳價誠恐應墊各款棧中更難周轉自係實情所有皖商應繳鹽價仍飭照章辦理毋庸更張惟查海

分司摺報墊發之款總以該棧江運成本爲最鉅動逾
十數萬兩此後收到鹽價務須隨收隨發俾免商人藉
口

光緒十四年七月皖岸北鹽運商慶豐泰等稟前因本重
銷滯疊叩酌減捐款牌價奉批此案前據該商等稟請
減捐當以棧中公用較前更鉅儻再減捐勢必不支仰
見慎重公款之至意查北鹽係照南鹽呂四極貴牌價
發售每引已多一千五百餘文南鹽歷減各捐每引僅
完四百八十餘文北鹽仍一千二百四十五文照南鹽
成本每引共加重二千二百餘文之多合每票則昂於

南鹽二百六七十串且南鹽各場牌價貴賤不齊南鹽
係運和鹽其價本輕於尖鹽每包皆不過九百文上下
惟商等北鹽係照從前呂四牌價一色發售嗣後呂四
牌價曾經減過北鹽牌價尙未核減是不獨皖岸南鹽
無此極貴牌價卽淮南通岸通場亦均無商等牌價之
貴者皖岸南鹽內河各捐固已裁減卽鄂湘西等岸亦
厯有減捐之案惟商等北鹽仍照初定章程完繳成本
不獨重於皖岸南鹽且重於鄂湘等岸尖鹽皖岸南鹽
與鄂湘西三岸投咨祇繳五成其餘五成併各捐均俟
買鹽補繳惟商等初投北咨鹽價並各捐則須全數預

繳較南鹽加倍之多既獨占攔銀利之苦又值錢價陡貴更受暗中折耗之虧且自加引以來因皖岸猝增一百票之累銷市更滯良由皖岸兵燹之後戶口人民僅有此數彼有所盈卽此有所絀况商等成本獨重到岸輪售則與和鹽相同每石均定價銀二兩八錢是餘利已輕於南鹽又復一耗於預繳全價再耗於錢價陡增更耗於回課日遲轉輸日滯暗耗疊增况今年催運急迫各商鹽皆堆積於岸資本占攔虧耗甚多累上加累成本核實若干實無可省非若官中尙有閒款可裁商等餘利舍此而外無可他求非若官中尙有他款可撥

是捐減而公用不充或有變通之策如不核減則商情竭蹶絕無補救之方加以去歲黃河大捐支持愈難因思北鹽邊境滌來全三岸本因無商認運由官權爲試辦以固藩籬其初每年銷數極疲不過四五百引嗣自光緒四年後將餘利撥充緝費局員悉心整頓疏導有方每年銷數倍增近年竟至五六千引之多所存餘利除充緝費而外所餘或鉅乞准將捐款量予裁減以資補救其棧中公用懇將官運所存餘利飭發彌補若因款目各有不同未能動撥或懇將滌來全三岸賞還商等以額內之票承運俾可稍固藩籬抑或將額運北票

赴壩官捆之鹽准歸商自行赴壩承運查官定赴壩水
腳每包一百六十文如歸商運自雇船隻每包可核減
浮費數十文卽此敷用毫不與船戶相涉每引成本計
可節省數百文官運尙須押運委員薪水每年約四千
餘金商運則此款毋庸開支官項亦可節省至赴壩斤
兩由商照向章交棧仍由棧發商領運凡有餘斤仍歸
棧運售歸公亦不至窒礙經鹽政曾國荃批北鹽捐款
勢難酌減疊經明晰批示其官運餘利皖局專恃此項
爲緝私之費何能撥補棧用至請將滁來全三岸歸商
承運或將北鹽由該商等自行赴壩領運各層思奪官

運之利爲肥己之謀更屬妄生希冀應毋庸議

兩淮鹽法志卷八十三